



Siverth K. Heilmann

UPA 2022/61-1

Atassut

06. Maj 2022

Qilalukkat nipinut illersorneqarnissaat siunertaralugu kangerlunni qaqortat qernertallu sivilunerusumik najortagaanni angallatit aalajangersimasut ingerlaartarnerisa killilerneqarsinnaanerannut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuineq UPA 2023-mut naammassineqarsimassaaq iliuusissanillu aalajangersimasunik siunnersuutitaqassalluni.

(Inatsisartunut ilaasortaq Jens NapätôK' Naleraq)

Siullermik inatsisartuni ilaasortaq Jens NapätôK' Naleraq inatsisartunut aalajangiiffigisassamik siunnersuuteqarninnut qujanaq, imatullu Atassummiit oqaaseqarfigissavarput.

Tunup imartaani qilalugartassiisernerup ikiligaluttuinnarnerinik uumassusilerisuniit siunnersuineq aammalu ilisimasat nutaat aallaavigalugit 2019-mi pisassiisimaneq iluarinagu ilanngullugit Naleqqami eqqartorsimasatik tikkuarneqartullu ilisarnartut assertuinnagassaannngillat.

Issittup imartaani, uumasut nipit atorlugit attaveqartarnerat nerisassarsiortarnerallugooq illersorniarneqartariaqarmat, ilaatigut ilisimatusartuniit ernummatigineqarmat, umiarsuit angisuut takornariartaatit kilisaatillu Tunumi Kangerlussuaq, Qaanaallu kangerlussuani, allanilu kangerloqarsinnaasuni pulasoqarsinnaaneraniq inerteqquteqarnissaq isummertinniarneqarpugut.

Tunumi piniartuunermiit aalisarnermut ikaarsaariartoqarsinnaanera, minnerunngitsumillu imartarujussuatta annertoqisup, uumasooqassuseq aalisagaqassuserlu, pingaartumik Illoqqortoormiut Kangerlussuat ilisimatuussutsikkut misissuisoqartariaqarnera pillugu Atassummiit manna oqaluttarfik atorlugu kaammattuteqartarpunga. Piniakkat nerisassamminnik malersuisuummata najugarnaartillu nerisassaqtillutik qimannaviannngimmassuk aasaanerani skuunnginneranilu misissugaassaqqitsissimavara.

Nunarsuarmi Kangerlussuit tannersaat, Illoqqortoormiut eqqaaniit aallaaveqartoq, ukiukkut sikuulluni tamavimmi qaortuinnarsuusoq, avannarpassinnerusortaanili ilorpassisortaanilu sarfarinnersaani sikoqanngitsorsuusoq 1982 – 1983-mi politiitutorfeqarnerma nalaani ujaasitilluta helikopterimik tupigusuutigegalugu takusimavara.

Eqqaamaqaara innuttaasut politikkerillu ilaasa ernummatigeqigaat, angallatit aalisariutit aquuteralaalulu atugaaleriartorneranni nipilioqimmatagoq, piniakkat suulluunniit imartatsinniik qimarrallutik tammassasut. Qangaaniilli ilisimavara, piniakkat ulimukaarneq tinimukaarneq sarfarlu naalagaralugit neriniarnerminni kangerlunnut pulajuartartut.

Piniarneqalerunilli soorlu qilalukkat nalinginnaalluinnarpoq avammut qimaasarnerat soorunami avasinnerusumi allaanerusarpoq. Kikkulluunniit piniartuugunik piniartuunngikkaluarunilluunniit nalunngilluinnarpaat assersuutigalugu qipoqqarpassuit angallatit nipiliorneri soqutiginnngivillugit angallaffioqisumik eqqissiivillutik, neriniarnertik ingerlattaraat.

Eqqaqqillara imartarujussuagut aalisarfigineq ajukkagut atorluaanissamut periarfissiigutta, aalisartortatta nunattalu aningaasarsiornerunissaanut aqutissiuussissaagut. Aalisariutit kilisaatit aalisarfigineq ajukkatsinni misileraasinnaanerat aqutissiuunniartigu. Oqaluinnarluni angusaqarsinnaanngilagut piffiit ilaanni nuna sanilerisamik aningaasarsiorfissamik suliffissanillu pilersitsisareernerput ilinniarfigineqarniarli.

Takornariaqarnerup iluani, Nunatta pinnissusersua taannaralutigut aningasarsiorfiit ilaattut inerisarparput iluaqutigalugulu. Soorunami piffiit ilaanni mianerineqartariaqartutut isigisatsinnut nunaqavissut inuuniarnikkut illersorumallugit ersarissunik aalajangersaanissaq pisariaqarneralu avaqqunneqarsinnaanngillat.

Taamatut Atassummiit oqaaseqaaseqarluta inassutigissavarput suliap aappassaaneerneqartigani ataatsimiititaliani susassaqartuni nalilersuinerit ingerlaqqaarnissaat kissaatigaarput, neriutugalugulu oqariartuutigut ilanngullugit nalilersorluarneqassasut.

Qujanaq.